

發刊詞

願憑毛穎頌神恩

-- 循理會刊代創刊詞 --

雪花六出，徵氣候之已寒，梅瓣五開，識陽春其不遠；
聖誕佳節，瞬又屆臨。喜訊報傳，澈夜通宵呼喚；
歌聲嘹亮，震天動地驚聞，
靈力覆庇，無分東西南北，
神恩浩蕩，豈計不肖賢愚？
宜乎薄海同慶，萬民共仰：
狂歡則三千雀躍，讚頌而四谷雷鳴，
榮耀歸與真神，平安屬乎人類；
惟念罪惡淵中，災黎之呼號慘厲；
沉淪道上，撒但之伎倆囂張，
道德蕩然，良心湮沒，
或罪裏以尋歡、或苦中而作樂、
或則麻木心靈，金迷紙醉、
或則摧殘生命，油竭燈枯。
國攻國，殺人盈野；
民打民，殺人盈城，
孜孜為利，不惜殘人自肥；
切切爭名，何堪攻訐揚穢。
罪惡滔天，血腥遍地，
真神之忿怒快臨，地獄之慘悽難免，

有心人能不痛心疾首，悲憤填膺耶？
竊維救主，位屬真神，
捨天上之尊榮，受人間之慘酷，
十字架上，血瀦常新；
橄欖山前，呼聲仍舊，
益懍傳揚真道，分所應宜，
見證神恩，理難推諉，
用是共揮彩筆，寫神恩之無窮；
謹獻寸心，愧人力之有限，
此循理季刊之所由生焉。
至於報導會務，聯絡感情，為餘事也。
爰綴數言，申創刊之由來，
更求代禱，仰鴻恩之厚貺！